

3

DE
FAVORE COMMERCIORVM
LIBER PRIMVS

Q V E M
AVCTORIT. ILL. ICTOR. COLLEG.
IPS. KALEND. OCTOBR. CIOIOCCCL

PRO
OBTINENDO DOCTORIS GRADV
DEPENDET
CHRISTIANVS GOTTHELF
G V T S C H M I D.

L I P S I A E
EX OFFICINA LANGENHEMIANA.





PRAEFATIO.



Fauere iura commerciis et par esse ut iis faueant expedita, ipsisque artis nostrae tironibus notissima res est. Nec desunt qui priuilegia aut si mauis iura singularia fauore merciorum mercatoribus et mercaturae concessa, vel congegesserunt in timendae molis volumina, vel percensuerunt disputationibus academicis. Quorum laboriosa industria, si hanc iurisprudentiae partem, et illustratam egregie et gnauiter obscuratam, ingenue dixerò, sententiam meam aequis et peritis rei arbitris, probatum iri, scio, non opinor. Pauci sunt, quorum labor ingenio distinguitur. At plerisque accidit, quod accidere solet hominibus, qui in literarum studiis, labori primas, ingenio ultimas tribuunt partes. Copia scilicet ad inopiam rediguntur, et quum in augendo conclusionum numero, in constipandis affinibus et contrariis, in densandis denique eorum, qui consentiunt aut dissentiunt ceteruis, verbosi sint et moleste seduli: solet eos deficere ingenii vis et acies in ponendis aequi ac boni principii,

cipiis, in connectendis rerum causis ac consequutionibus. Non inuestigant curatius, quae sit commerciorum natura, quae formae, quae partes, qui cum salute reipublicae nexus; quae sint porro fauoris quem respublica commerciis debet causae, qui limites, quid in publico priuatoque iure efficiat. Non docent accurate et perspicue, quibus iuris naturae et gentium legibus, quibus prudentiae civilis praeceptis, omnis haec innitatur doctrina, et qua porro ratione cohaereant, in quem adducenda sint ordinem, iura scripta et consuetudines, quae ex Iure Graeco, Romano, Byzantino, Canonico, aliarum denique gentium et legibus et moribus, in iurisprudentiam consuxerunt mercatoriam. Non eo haec scribo consilio, ut detrahā aliquid inuidiose et diminuat de meritis laudibus STRACCHAE, MOLINAEI, HEYIAE, MARQUARDI, et aliorum, qui praeclaram iuri commerciorum nauarunt operam, sed ut ostendam, in argumento, quod nouitatis gratiam exiit et cuius a multis occupata videtur possessio, superesse nihilo minus noui laboris materiam. Quum ergo per rerum mearum rationes, ad peruestiganda diligentius commerciorum iura compellar; quae de eorum favore meditatus sum, peritiorum examini submittere mecum constitui, ut aequo illorum iudicio, confirmentur recte dicta, deleantur praua, emendantur quae lima indigent. In id aciem intendi praecipue, ut bene prouisa ac diligenter explorata ponerem principia, et quatuor ac gentium iura prudentiaeque civilis praecepta cum legibus scriptis et moribus mercatorii sollicitè componerem. Quo consilio iunxi meditationi, scriptores, qui iuuare possent meditantem, quos quidem in quatuor classes commodè diuidi existimo. Primae ipsos adscripsi mercatores, qui negotiationis naturam, partes, opportunitates, subsidia, impedimenta etiam, scribendo explanarunt. Hi enim tēdas praeferunt illis, qui certo iudicio leges commerciis accommodare cupiunt. *) In alteram eos retuli,

retuli, qui ex prudentiae ciuilis regulis, docuerunt quo, ciuitatis et legum fauore, quibusque subsidiis effici possit, vt floreant commercia et reipublicae sint salutaria. **) Tertia, scriptores complectitur, qui iura commerciorum et mercatorum, iustis voluminibus aut disputationibus academicis explicare instituerunt. ***) Quarta denique eorum vtilissimos labores comprehendit, qui antiquitates et historiam commerciorum scripserunt ita, vt inde aut iuuandae mercaturae peti possint consilia, aut iura commerciorum illustrari. ****) Taceo eos qui suis de his rebus obseruationibus alia distinxerunt opera.

His adiuta subsidiis meditatio, eam mihi praebuit materiae copiam, vt in tres illam libros distribuere necessum fuerit.

PRIMO igitur de commerciorum fauore generatim exponam, positisque principiis, illius causas, limites, et quid in vniuersum efficiat, explanabo.

ALTERO, quid efficiat in negotiis reipublicae externis,

TERTIO, quid in domesticis, enarrabo speciatim.

Do in praesenti primum, daturus reliquos propediem, si volet Deus et si primum, harum rerum peritis non displicuisse intellexero.

*) Primum in his locum suo iure obtinet IACOBVS MERCATORY vir de re mercatoria christiana non minus optime praeparatus. Eius industriae et repetitis illi IACOBVS SAVARY DESHERVSLONS curis, debemus librum egregium, *Le parfait negociant ou Instruction générale pour ce qui regarde le commerce*, cuius octaua editio Amstelredami prodit MDCCXXVI. porro *Pareres ou Avis et Conseils pour le Commerce*, quod volumen iungi solet priori; denique *Le Dictionnaire de Commerce*, contenant tout ce qui concerne le Commerce dans les quatre parties du monde, vtilissimum opus et summis dignum laudibus: elegantia reliquas superat editio Parisiensis tribus voluminibus: maiore Voluminibus MDCCXLI. Succedunt his duanauis RICARDI, pater et filius. Scripsit enim SAMVEL RICARDVS *Traité général*.

néral du Commerce, quem librum perutilem, ad noscendas inprimis mensurarum, ponderum et nummorum proportionem, auctiorem edidit STRVYCKIUS Amstelædami c1515ccxxii. Idem SAMV-EL RICARDVS scripsit *L'art de bien tenir les livres de comptes en parties doubles à l'Italienne, avec une table alphabetique de l'Explication des termes, qui sont le plus en usage dans le commerce*; necessarium opus ad intelligendos et examinandos mercatorum codices, auctius edidit filius IOANNES PETRVS RICARDVS Amstelædami c1515ccxxiv. Addendus ex Italis, Il Negoziante di DOMENICO PERI Venez. c1515cclxxii. ex Germanis GODOFREDI CHRISTIANI BOHNII wohlgefährner Kaufmann. Recus. Hamburgi c1515cccl.

* *) In his eminent quatuor scriptores recentiores, qui acri iudicio, politicam vti appellari solet commerciorum doctrinam, illustrarunt egregie. IOANNIS LAWII Viri ad summa nati *Considerations sur le Commerce et sur l'Argent*, oblatae Supremo Scotiae Senatui anglie, quarum gallica versio edita est Hagae Comitum c1515ccx. Dignus est iste libellus magno LAWII ingenio, nec alienus a consiliis quae secutus est ipse, de quibus aliter existimant rerum intelligentes, aliter vulgus. Porro MELONII *Essai politique sur le Commerce*; quod vti id modestè vocat tentamen, auctius prodiiit Amstelædami c1515ccxlii. Iudicium MELONII acre et certum, rerum quae ad commercia pertinent, omniumque reipublicae utilitatum cognitio accurata et ipso firmata usu, amor denique humani generis et publicae felicitatis cura, id huic libro constituunt pretium, vt in optimis habendus sit merito et utilissimis. Iungendus MELONIO, in illis praefertim, quae ad curam monetae et pecuniae permutationem spectant, qui subtilius ista rimatur Auctor *Des Reflexions Politiques sur les Finances et le Commerce*. Tom. I. II. Hagae c1515ccxli, qui DUTOT esse dicitur. Venio denique ad immortale et aeternum opus Illustris Praefidis de MONTESQUIOU, L'ESPRIT DES LOIX, nunquam de manibus deponendum, illis, qui in arte aequi et boni audere ultra vulgus sapere. Eius vero Liber XX. agit *Des Loix dans le rapport, qu'elles ont avec le Commerce considéré dans sa nature et ses distinctions*, et Liber XXI. *Des Loix dans le rapport qu'elles ont avec le Commerce, considéré dans les révolutions qu'il a eues dans le monde*. Multa etiam vilia continent IOANNIS IOACHIMI BECCHERI et PAVLLI IACOBII MARPERGERI de hoc argumento scriptiones, licet in iis desideretur ordo et cura. Addi ex Dissertationibus politicis meretur, HERMANNI CONRINGII de Commerciis et Mercatura Helmstad. c1515cclxvi. et ANDRAE GROENWALL de Commercij. Vpsaliae c1515ccxxvii.

* *) Longus esset labor et haberet taedium multum, utilitatis parum, si per-

si percerere vellem plerosque tantum de Commerciorum Iure libros et disputationes. Legi possunt in Bibliotheca Juris LIPENIC-IENICHIANA eiusque Supplementis, si euoluas titulos. commercium, Mercatura, Mercator, Contractus Mercatorum. Eminent in illis STRACCHA, MOLINAEVS, SCACCIA, MARQVARDVS, ANSALDVS, CASAREGGIO. Addi meretur IOANNIS DE HEVIA BOLANI Labyrinthus commercii terrestri et naualis, qui ex Hispano idiomate in latinum versus prodiit Florentiae MDCCCII. In causis Commerciorum quae ad ius gentium spectant, palmam paucis quos ea de re habemus scriptoribus praeripiunt, Viri Illustris IO. IACOBI MASCOVII, Disputatio de Foederibus Commerciorum, Lipsiae MDCCCXXXV. HEINECCIANA, de Iure Principis circa Commerciorum libertatem tuendam, Halae MDCCCXXXVIII. et Liberi Baronis BACHOFFII AB ECHT de eo quod iustum est circa commercia inter gentes, ac praecipue de Origine et Iustitia Societatum mercatoriarum maiorum, Ienae MDCCCXXX. ad disceptandum proposita. Addendum ex ABBATIS MABLYI *Droit public de l'Europe*, Caput XI. quod in eleganti libro est omnino elegantissimum.

*** *) Primo rursus loco nominandi sunt duo libri gallici egregii illi et perquam vtilis, nimirum PETRI DANIELIS HVETII *Histoire du Commerce et de la Navigation des anciens: et L'Essai sur la Marine et sur le Commerce par Mr. * * * (DESLANDES) avec des remarques historiques et critiques de l'auteur.* Amstelædami MDCCXIII. Prodiit etiam Parisiis duobus Voluminibus, *Histoire generale de la Marine, contenant son origine chez tous les Peuples du Monde, ses progrès, son état actuel, et les expéditions maritimes anciennes et modernes* MDCCXLIV. magnum opus et splendidum, sed spectat praecipue ad rem militarem, proinde optamus vt edatur, *L'Histoire de la marine politique*, quam in praefatione promittunt auctores. Vir amplissimus IACOBVS HENRICVS BORNIVS de iure stipulae et nundinarum Ciuitatis Lipsiensis scripsit Dissertationes binas, quarum secunda editio auctior prodiit Lipsiae MDCCXXXIX. Praemisit vir doctissimus Dissertationi primae §. II - VIII. observationes, de praesidiis et incrementis commerciorum apud Graecos, Romanos et Germanos, breues illas quidem, sed haustas a fontibus. Faciunt praeterea ad Romanorum mercaturam et commercia rectius cognoscenda IOSEPHI AVERANII Interpretationum iuris libri secundi caput XIII. IO. AVG. ERNESTI humanitatis et elegantioris doctrinae statore, Libellus de Negotiatoribus Romanis Lips. MDCCXXXVII. et Viri Consultissimi IO. GOTFR. SIEBERI binae dissertationes de Argentariis. Lips. MDCCXXXVII. et MDCCXXXIX. editae.

LIBER PRIMVS.

I.

Inest hominum cuique insita quaedam vel potius innata et viuendi et bene beateque viuendi cupiditas: habent quoque singuli quasdam mentis ac corporis vires, aptas illas et habiles, ad vitam conseruandam et ad paranda ea, quae illi feliciter transigendae inferuiunt. Is ergo omnibus a natura Deoque naturae auctore et artifice propositus intelligitur finis. Quumque fines necessitate quadam cum illis rebus cohaereant, sine quibus obtineri nequeunt; colligimus, data esse singulis hominibus ea iura, impositas eas leges, sine quibus finis ille omnibus communis obtineri nequit. Datum scilicet omnibus ius, viribus suis ad vitam conseruandam et feliciter agendam, vtendi: imposita singulis necessitas, non laedendi ius quod aliis natura dedit aut sibi ipsi quaesierunt: tributum denique vniuersis ius cogendi alios, vt a laedendo abstineant et damnum iniuria datum reparent. Est igitur, vt rem omnem vna complectar formula, est cuius homini ius, salutis suae, omni qua potest ratione consulendi, modo a laedendo aliorum iure abstineat.

II.

Hominum vero genus ita factum est, vt homini homo plurimum et obesse possit et prodesse, nemoque tranquille, nemo beate viuere queat, nisi alii et a nocendo abstinere cogantur, et ad auxiliatricem beneuolamque opem ferendam inuitentur; quum sint praesertim permulti ad nocendum prouiores quam ad ferendam opem. Natura ergo spe metuque homines, ad voluntates et vires communis vtilitatis causa consociandas, impulit. Nata inde coniugum, nata parentum et liberorum, nata denique eorum coniunctio, quos communis nascendi fors, aut in domo simul viuendi pactio, in fami-

familias congregauit. Aucto deinceps familiarum numero, necessitas et vtilitas suavit, vt plures familiae voluntates et vires ad vim propellendam et mutua commoda prouehenda sociarent. Quumque illae plurium familiarum confociationes finibus hisce obtinendis minus sufficerent, nisi certo et vno imperio singulorum voluntates et vires ad communem dirigerentur salutem, enatae sunt Ciuitates, Respublicae. Populi, Gentes. Quo enim cunque nomine ciuitatem appelles, erit semper, coetus hominum et familiarum, sub vno eoque summo imperio, communis salutis causa, sociatus.

III.

Quum igitur communis salutis causa in ciuitates coe-rint et ciuili imperio subiecti viuant homines, ex ipsa confociationis lege consequitur, imperantes aequae ac ciues, ad omnia ea agenda obstrictos esse, sine quibus salus communis obtineri nequit; porro, ad omittenda ea, quae cum salute communi pugnant; denique si quando commoda priuata publicis aduersari contigerit, ad anteponenda priuatis publica. EST ERGO SALVS POPVLI SVPREMA CIVITATIS LEX. *) Salus illa duas habet partes; primam, vt ciuitas omnesque ciues, a vi externa et interna securi, tranquille viuere et suis vti possint rebus; alteram, vt ne indigeant, sed abundant potius, iis quae ad vitae necessitates et vtilitates pertinent. Eo ergo redit omne imperantium ius, omne quod iuri cohaeret officium, vt cuncta ciuitatis ciuiumque negotia et publica et priuata, ita regant, ita ordinent, vt communis a vi externa et interna securitas, communis rerum necessariorum et vtilium abundantia, quoad fieri potest, et conseruetur et augeatur. Nec alius huic salutis publicae studio a naturae lege praescribitur limes, nisi vt absteineatur a laedendo aliorum iure. Est scilicet ciuitati, vti hominibus singulis, ius salutis suae omni qua potest ratione consulendi, dummodo a laedendo aliorum iure absteineat.

*) Scite CICERO de Leg. III, 3. quum de consulibus edixisset, conceptis verbis addit OLLIS SALVS POPVLI SVPREMA LEX ESTO. Haussit praeceptum ab aeternae legis fontibus, non ex prisca illa, quam rulerunt Deceinui, iussit Populus Romanus. Laudat, quam proposuimus, regulam, sed simul de prauo eius vsu, in illis praesertim rebus, quae ad commercia pertinent, amarum addit querimoniam, MELONIUS Cap. XX. p. 287. *Le salut du Peuple doit être la Loi suprême. Maxime fondamentale de tous les Gouvernemens, mais dont tous les Gouvernemens ont abusé. Ils s'en sont servis pour couvrir l'ignorance ou les passions. De-là des attentats, des proscriptions, des violens de la foi publique. Avant que d'avoir recours à cette Loi terrible qui détruit toutes les autres, il faut une évidence morale, qu'il n'y a point d'autres ressources. Ce serait une histoire bien intéressante et bien utile, que celle des malheurs causés par l'imprudence ou la fautive application de cette Maxime. On a osé l'employer dans la partie de Finance attachée au Commerce, préférablement à cent autres expédies plus faciles et plus avantageux. Recte et ex vero. At non sunt scelera illa, nefanda sine, regulae imputanda, sed artibus malorum administris. Abhorrent ab his boni omnes, et facis, ut opinor, ea damnari flagitia, dum supremam publicae salutis curam, et ex veris derivavi fontibus et definiendo explanatae, eos circumdedi cancellos, extra quos eam non finit egredi lex aeterna.*

IIII.

~~Iuris communione continetur ciuitas.~~ Id vero duplex est. Publicum alterum, alterum priuatum. Prius totius reipublicae, posterius singulorum commoda, proxime sibi habet proposita. Publicum in externum et internum apte, ut existimo, partimur. Externum, publica totius ciuitatis cum aliis ciuitatibus negotia, rationis lege et gentium pactis regit. Internum Reipublicae formam et administrationem ex legum et pactiōum praescripto ordinat. Illud ad ius publicum gentium pertinet, hoc fere intelligere solemus, quum de iure publico, nulla alia voce addita, loquimur. Constituta publico iure respublica, singulorum ciuium vtilitati prospicit iure priuato. Quum vero sit salus publica, suprema ciuitatis lex; omne et publicum et priuatum ius, quod ab eius pendet arbitrio, ad salutem populi est referendum, ita scilicet ut consentiat cum sempiterno et vniuersali naturae iure, et eius leges ea ratione suppleat, atque ad statum ciuitatis

tatis adcommodet, quae ad salutem populi est vtilissima *). Hac certe norma, quod in cuiusque ciuitatis publico et privato iure bonum est et iustum, ab iniusto et malo diuiditur.

*) Larius haec et suq more, id est acure et eleganter persequitur Illustris CAROLVS OTTO RECHENBERG in Disputatione de Norma legum iustarum ab iniustis discernendarum Lipsiae M DCC XI. edita. Caeterum eadem vti nos ratione, Ius Romanum, Iura ciuitatis et publica et priuata ad populi salutem refert. De genere PAVLLVS L. 11. D. de Iustitia et iure I, 1. *Ius pluribus modis dicitur: Vno modo cum id quod semper aequum ac bonum est, ius dicitur; vt est ius naturale. Altero modo, quod omnibus aut pluribus in quaue ciuitate vile est. De formis VLPIANVS L. 1. §. 2. D. de Iust. et Iur. I, 1. Huius studii duae sunt positiones, publicum et priuatum. Publicum ius est quod ad statum rei Romanae spectat: Priuatum quod ad singulorum utilitatem; sunt enim quaedam publica utilia, quaedam priuata. Facile etiam cum nostra componi potest diuisione, et cum praeceptis apertissime consentit, Illustris MONTESQUIOU sententia, qui tres nominat Iuris formas *Le Droit des gens, Le Droit Politique et le Droit Civil*, easque erudite explicat, v. *L'esprit des Loix*. I, 3.*

V.

Natura homines omnes et aequales sibi fecit et aequale omnibus indidit felicitatis desiderium; ad omnes porro ciues pertinet ciuilis confociationis et subiectionis lex; omnes aequali iure suae felicitatis in ciuitate rationem haberi postulant. Est ergo eorum qui iura constituunt, est eorum qui constituta interpretantur et ad formas obueniennes adplicant, aequale ciuibus tribuere ius; nemini iubendo, vetando, nemini absoluendo, damnando, duriores caeteris, nemini aliis mitiorem statuere conditionem; sed conseruare in rebus causisque ciuium omnium, omnibus, legitimam et vscatam aequalitatem.

VI.

Adscribenda autem est ad aequalitatis legem et addenda haec exceptio; nisi salus populi quibusdam ciuibus, rebus, causis, iura tribui singularia, euidenter postulet. Est scilicet

cer superior omnibus, publicae salutis suprema lex, ea reli-
quas omnes emendari, corrigi, suppleri par est, si vel lati-
tudine peccant vel angustia. Incidere vero potest et incidit
saepe, vt quae aduersantur insigniter publicae saluti, cohiberi
non possint, nisi aucta legum seueritate. Incidit, vt sint ne-
gotia quaedam ad publicam salutem non vtilia modo, verum et
necessaria, quae tamen nec suscipi soleant frequenter, nec
confici possint feliciter, nisi propenso iuuentur et publico
reipublicae fauore. Recte ergo illis odiosa, his fauorabilia
irrogantur priuilegia; seu iura singularia, quae recedunt a
legitima et vtitata iuris aequalitate, sed manifesto reipublicae
emolumento *). Adest certe manifesta in propositis formis,
inaequalitatis aequitas.

*) Redit eo PAVLLI definitio L. 16. D. de Legibus I, 3. *Ius singulare est, quod contra tenorem rationis, propter aliquam utilitatem auctoritate consensuentium introductum est.* Tenor rationis, est generalis et constans iuris ratio et ordo. Recedit ab eo propter utilitatem ius singulare: cuius crebra occurrunt in iure Romano exempla, vt recte dixisse videatur IULIANVS L. 51. §. 2. D. ad L. Aquil. IX, 2. *Multa iure ciuili contra rationem disputandi, pro utilitate communi recepta esse, innumerabilibus probari posse exemplis.* Iura singularia, priuilegia appellauimus. Minus proprie, fateor, sed exemplo legum. Priuilegium antiquis est lex in priuatum id est vnum priuatum hominem lata. Qualia hiberis gentibus odiosa, irrogari absolute vetant, Atheniensium vt videtur exemplo, XII. Tabulae. Luculenter haec explicunt Viri Illustris GEORGII CHRISTIANI GEBAVERI *Singularia de Priuilegiis*, Gotingae MDCCXLIX. edita. De his VLPIANVS L. 3. D. de Legib. I, 3. *Iura non in singulas personas, sed generaliter constituuntur.* Sed contra verbi proprietatem, iura singularia, ordini ciuium, certisque causis data, frequenter satis, priuilegia nominant, iuris nostri conditores. Sic, vt ex innumeris exemplis afferam pauca, commemorantur Priuilegia militum, L. 24. D. de testam. milit. XXIX, 1. pupillorum L. 42. D. de admin. et peric. tut. XXVI, 7. creditorum priuilegiariorum, L. 17. 18. seqq. D. de reb. au& iud. possid. XLII, 5.

VII.

Missis odiosis, disputamus de fauorabilibus. Fauere
respublica et ciuitatis iura, illis dicuntur hominibus, rebus,
causis, quarum singularem gerunt curam, quibus iuuandis
iura

iura dant singularia *). FAVOR ille iustus est, si iustas habet causas, iustos limites, si id denique efficit, quod vult salus populi, nec laedit ius aliorum. Idem legitimus est, si introducunt eum et probant leges, si porro id agit, quod eadem iubent, quod praescribunt. Quae vero sint nominatim iustae et legitimae fauoris huius causae, qui limites, qui effectus, ex generali iurium singularium regula, facile et intelligi potest et demonstrari.

*) Vt or fauoris voce, sicut ea vti sunt romani iuris conditores. Commemorant illi multas fauoris formas; Fauorem dotium, L. 9. §. 1. D. de iur. dot. XXIII, 3. Fauorem pupillorum L. 42. D. adm. et peric. tutor. XXVI, 7. Fauorem religionis L. 17. pr. D. de vusu. et quem adm. VII, 1. Fauorem libertatis L. 122. D. de R. I. L. 17. et similes fauores alios, qui subsunt omnes ei quod definiuimus generi.

VIII.

Ad iusti et legitimi fauoris, iustas et legitimas causas, primo quidem ipsa reipublicae salus atque vtilitas, pertinet *); deinde is quorundam hominum et negotiorum cum salute reipublicae nexus, ea conditio, vt et indigeant singulari reipublicae cura beneficisque priuilegiis, et vtrumque mereantur. Sunt scilicet homines hominumque ordines, quorum salus cum salute reipublicae cohaeret, sed eas habet difficultates, ea pericula, vt nisi respublica singularem eorum suscipiat curam, aut desint illi prorsus aut satis prodesse nequeant. Sunt porro negotia quaedam ita comparata, vt vtile sit reipublicae et necessarium, suscipi ea frequenter, confici feliciter. Ea vero saepius ob multas quibus premuntur difficultates, ob plurima quibus exposita sunt pericula, nec solent frequenter satis suscipi, nec possunt vtiliter procurari, nisi respublica eorum agat curam, et singularibus iuris beneficiis homines ad suscipienda alliciat, in procurandis adiuuet et tueatur. Fauendum ergo iis negotiis, quae ob insignem cum salute reipublicae nexum, insignem merentur fauorem, et ob difficultates et pericula, eodem praecipue indigent.

*) Vtilitatem reipublicae primam esse et principem legitimi fauoris causam, accurate etiam et eleganter docet ius romanum. Duo asseram exempla,

exempla, ne sim in aperta re et simplici verbosus. Fauet dotibus. Caussam ex PAVLLO discite L. 2. D. de Iur. Dot. XXIII, 3. Reipublicae interest, mulieres dotes saluas habere, propter quas nubere possunt. Fauet sepulcrorum religioni. Caussam planissime PAPIANVS explicat L. 43. D. de Religios. XI, 7. Nam propter publicam utilitatem, ne insepulta cadavera iacerent, strictam rationem insuper habemus, quae nonnunquam in ambiguis religionum quaestionibus omitti solet, nam summam esse rationem, quae pro religione facit.

IX.

Sintne in earum rerum numero commercia, quae iuris ac reipublicae fauorem merentur, eoque indigent, vt perspecta tota caussa existimari possit rectius; eorum naturam, formas, partes, aperte et plane explicabo.

X.

Sunt ea de quibus loquimur commercia, MUTATIO MERCIVM QVAS NOBIS MINVS NECESSARIAS CREDIMVS CVM IIS QVAS MAGIS NECESSARIAS EXISTIMAMVS *). Suo scilicet iure homines, sibi et de iis prospicere solent, quae ad vitam conseruandam pertinent, et ea adpetere, quae illi ~~commode et iucunde transigendae~~ inferuiunt. Ea autem est orbis terrarum facies, vt non omnia omnis proferat tellus. Ea hominum conditio, vt non omnium eadem sint facultates. Negat vni regioni natura, quae larga manu concessit alteri: indiget pars hominum illis, quibus abundant alii. Vt ergo consulatur singulis, necesse est, communicari inter omnes bona varie diuisa, et mutari quibus abundamus, cum iis quibus egemus. Seruat sibi quisque, quae ad vitam conseruandam et suauiter transigendam sunt vtilia; quum vero aliis praeterea rebus sibi opus esse sentit, seligit ex suis, quibus aut plane aut minori saltem incommodo se carere posse existimat, eaque cum illis mutat quae magis necessaria videntur. Dupliciter id fieri et potest et solet; simplici nimirum permutatione et interuentu pretii cuiusdam communis. Simpliciter permutaturus, do ego quibus abundo vt accipiam quorum indigeo. Antiquissimum

mum id. Sed ea res multum saepe habet difficultatis, quum nec indigeant semper, qui res nobis necessarias possident, iis quibus nos carere possumus, nec nos his quibus illi abundant. Auget difficultatem discrepans hominum iudicium, in aestimanda rerum quae permutari possent aequalitate aut inaequalitate. Augent eam locorum et temporum differentiae multiplices. Taceo plura. Vsu ergo introductum est, vt commune et eminens quibusdam rebus tribueretur pretium, vt, auro, argento, aeri, nummis. Eius iam ope insigni facilitate merces vtrinque aestimari et accepto pretio quae nobis minus necessariae vendi, dato magis necessariae emi possunt. Exercentur igitur commercia, permutando, emendo, vendendo, omnibus denique negotiis quae mercium permutationi, emitioni, venditioni, inseruiunt.

*) Varias tradunt commerciorum definitiones, qui de iis cum cura scripserunt. Nostra iam CICERONI in mentem venisse videtur, licet eam non generi aptauerit, sed variis quae generi subsunt formis. Refert scilicet ad munera quibus homines funguntur, et earum rerum quibus abundamus exportationem, et earum quibus egenus importationem, de Offic. II, 2, 13. Hominum porro coetu, iuris aequa descriptione, certaue viuendi disciplina, effectum esse dicit, *vt dando et accipiendo, mutandisque facultatibus et commodis, nulla re egeremus*. De Offic. II, 4, 15. ULPIANVS noster Fragm. XIX, 5. commercium definit, *emendi vendendique inuicem ius*. Nec id male: modo emtionem venditionem tam late intelligas, vt includat permutationem, nec ius, a iuris vsu seiungas. Eum enim commerciorum voce comprehendit ius nostrum. V. Tit. C. de Commerciis et Mercatoribus IV, 63.

Nostra id commodi habet definitio vt ea commerciorum natura, formae, vtilitates, subsidia, accurate possint explicari et luculenter. Simillima est MELONII illa. Cap. I. p. 9. *Le commerce est l'échange du superflu pour le nécessaire*. Quum vero si proprie et accurate loqui velimus, non sit semper in rerum commerciis, quod damus superfluum, quod accipimus necessarium; quum demus saepe necessaria, vt accipiamus magis necessaria, saepe quod accipimus superfluum videri posset nisi mutaretur cum minus necessariis: saepe denique existimatio de maiori vel minori rerum necessitate, opinio magis quam veritate nitatur: prateruli ego in definiendo illam mercium quae nobis magis aut minus necessariae videntur comparationem; aptiorem, vt mihi videtur, ad comprehendendas vna oratione omnes commerciorum partes et formas.

XI.

Varias quum habeant commercia formas, varie diuidi solent. Constitutum est nobis inuestigare nexum commerciorum cum republica, et inquirere, quibus reipublicae beneficiis, quo iuris publici et privati fauore efficiatur, vt floreat commercia et reipublicae sint salutaria. Missis ergo aliis diuisionibus, eam explicabimus, sine qua haec disputatio, nec institui potest commode, nec satis intelligi. Sunt nimirum commercia si ad rempublicam referantur, vel interna vel externa, seu quod idem est, vel domestica vel peregrina *). Internum et domesticum, ciues habent cum ciuibus. Externum ac peregrinum, cum externis, et peregrinis. Internum duas habet formas, vnam si ciues cum ciuibus, merces quas tulit natale solum et domestica elaborauit industria, permutando, emendo, vendendo communicant: alteram, si ciues cum ciuibus communicant, merces aliunde inuectas. Externi tres sunt formae: prima, quum nostra exportantur: secunda, quum inuehuntur peregrina: tertia, quum peregrina portantur peregrinis, sed interuentu ciuium nostrorum. In quibus singulis duo spectanda sunt, quae scilicet sit exportationis et inuectionis proportio, et cuius opera, cuius sumptibus peragatur vtraque. Commercium porro domestica et peregrina, singulorumque formas, variis modis et confundi et separari, facile intelligitur; sed omnes illae varietates, ad summa haec et reuocari possunt capita, et reuocandae sunt omnino, si quaeritur quid in illis reipublicae vtile sit, quid noxium?

*) IOANNES LAW diuisit vti nos commercium in domesticum et peregrinum. Domestici vnam commemorauit speciem: *Faire travailler le peuple et échanger dans le País ses propres denrées et marchandises.* Addenda omnino altera nostra; nam inuectae merces si porro a ciuibus eum ciuibus communicentur, nostrisque hominibus occasionem praebeant, vel iis in rem suam vtendi, vel in iis persiciendis lucrosam exercendi industriam, pertinent ad commercia interna. Externorum LAWVS sex numerat formas, quas ad tres reuocari iubent, diuidendi leges. Sic quod sexto loco dicit: *Fréter les vaisseaux et les*

et les loix, non singularis est commerciorum forma, sed pars, ut cambium, assicuratio, aliaque, quae modo ad hanc modo ad illam pertinent formam, prout mercibus exportandis, inuehendis aut transferendis inseruiunt. Ceterum acuminis et utilitatis plena sunt, quae eo loco de commerciorum formis et partibus LAWIVS scripsit. v. *Considérations sur le commerce et sur l'Argent*. Cap. II. p. 15.

XII.

Explanaui definiendo commerciorum naturam et formas. Perspicuum fit his argumentis, quod nec antea erat obscurum, commerciorum beneficio et apportari vndique, quae per varias terrae partes distributa sunt, et dari amplam singulis facultatem commutandi, cum magis necessariis, ea quibus minus indigent. Sine qua opportunitate si essemus, et deficerent saepe necessaria, et carendum foret omnino maxima rerum earum parte, quae faciunt, ut commode vivere possimus et iucunde. Sunt ergo commercia quae his omnibus prospiciunt et consulunt, non singulis modo hominibus, nec singulis modo ciuitatibus, sed vniuerso hominum generi, omnibusque gentibus maxime utilia. Merentur, quod ex eo consequitur, communem hominum omnium, omniumque gentium fauorem. *)

*) Quamuis ergo gentes iure perfecto ut aliarum gentium commerciis faueant, non possint cogi: obligantur tamen, licet imperfecte, ut faueant illis pacis bellique tempore, si fauor ille ipsis est innoxius, aliis utilis. Fluit id ex fonte iuris gentium imperfecti, de quo egregie III. MONTESQUIEU; *Le Droit des gens est naturellement fondé sur ce principe, que les diverses Nations doivent se faire, dans la paix le plus de bien et dans la Guerre le moins de mal, qu'il est possible, sans nuire à leurs véritables intérêts* ESPRIT DES LOIX I, 3. Non potest ex hoc principio aestimari ius gentium perfectum seu cogens. At recte inde deriuatur imperfectum, ad quod pertinet ille fauor, quem gentes aliarum gentium commerciis, debent omnino. Auget obligandi vim, is commerciorum nexus, ut multarum gentium utilitates coniungant, adeo ut quae gens fauet commerciis aliarum gentium, et sibi proficit, et multis aliis.

XIII.

Sed magis multo et arctius cum salute reipublicae cuiusvis, ciuium cohaerent commercia. Mercatura nimirum, quae commerciorum artem et frequentiam complectitur, non eam tantum habet vtilitatem vt apportet omnibus et imperiat, quae ad vitae necessitates et commoda pertinent; sed illis etiam, qui eam strenue et feliciter exercent, honestum et insigne affert lucrum, idque inter innumeros ita diuidit, vt ad vniuersam redundet rempublicam. Ponamus calculos, subducamus rationes. PRIMO, in ea republica cuius ciues magnam et copiosam faciunt mercaturam, nulli, quos natura dat prouentus, nulla industriae et artis opera vsu et fructu destituuntur. Iusto omnia pretio commutari, vendi, exportari possunt. Fit inde vt strenue colantur agri, ampla sit res pecuaria, frequententur vrbes, impigre exerceantur et floreat artes omnes. DEINDE, quum agricultura, res pecuaria, vrbium frequentia, artium successus, ipsa quoque mercium exportatio et inuectio, ac mercaturae partes innumerae, quum inquam ea omnia, si ampla sint et fructuosa, multos et in dies plures, conuocent, alant, ditent, homines hominumque familias; augetur commercii ciuium et incolarum numerus, augentur opes. PORRO aucto ciuium numero, auctis opibus, augentur commode et vtiliter ciuitatis vtilitalia, redditus, opes publicae, scit etiam insuper respublica, si grauiore inciderint necessitates, vnde illis subueniri possit. Nihil DENIQUE ad ciuitatis securitatem et abundantiam, duas illas publicae salutis partes, ciuium egegiorum multitudine vtilius est, nihil publicis priuatisque opibus efficacius. *)

*) Video me ardore quodam mentis, summa proposuisse ad quae eniti potest adiuta commercii respublica. Nec tamen induco quae scripsi. Recte qui magna cogitant, summa sibi proponunt, et enituntur quod possunt. Cogitemus quid in Anglia effecerit ELISABETHAE regnum; in Gallia HENRICVS IV; et SYLLIUS, LVDOVICVS XIV.

et COLBERTVS magni omnes; inter Batavos mercatorum societas. Adder, spero, Germania noua publicae felicitatis exempla. *Un commerce mène à l'autre, le petit au médiocre, le médiocre au grand. v. Esprit des Loix. XX, 4.*

XIV.

Succedunt laetis tristitia. Florent commerciorum beneficio respublicae. Egent e contrario et debilitantur, si negligunt commercia, si torpere patiuntur mercaturam. PRIMO enim multis illis et maximis carent commodis, quae ex commerciis deriuantur in ciues, ex ciuibus in rempublicam. Illis vero quum careant, felices et beatae esse nequeunt. DEINDE, quum ipsae negligant mercaturam, trahunt ad se peregrini exportationis et inuersionis quaestum, immo praeripiunt saepe ciuibus, domestici commercii lucra. Quo non potest non exhauriri ciuitas et prorsus eneuari.

XV.

Merentur reipublicae singularem fauorem commercia, merentur ut illis prolixè faueant iura reipublicae publica et priuata. Est haec prima iusti et legitimi fauoris causa. Progredior ad alteram. Eo indigent.

XVI.

Non id equidem volo, tolli commercia omnia, si destituantur reipublicae et iuris fauore. Id vero certum est, et nihil habet dubitationis, nec introduci posse in rempublicam, quae copiosa mercatura, principum aut ciuium vicio caret, commerciorum usum et frequentiam; nec ea retineri, defendi, augeri, uti merentur; nisi adsint illis, fauor publicus, cura ciuitatis, iuris beneficia. Habent enim tot difficultates, tot pericula, ut a tentando reuocentur, his vincendis minus adfuerit, sed et succumbant saepius, quos vincere ars et usus docuerat. Alliciendi ergo sunt opportunitate, priuilegiis, praemiis etiam. Defendendi ab aliarum gentium, imo ciuium quoque, vi et fraude. Iuuandi contra fortunae iniurias et fatorum casus. Quae omnia publicam poscunt aucto-

ritatem, publica subsidia. Auget fauoris necessitatem, plurimarum gentium aemulatio. Sciunt aut discunt sua commoda fere omnes. Certant de iuuandis, tuendis, augendis ciuium commerciis contentione maxima. Quae ergo in communi hac concertatione torpet inerti otio respublica, nec fauet impense suorum ciuium mercaturae; eius profecto commercia, non modo augeri nequeunt, sed quod magis est, ne conseruari quidem possunt. Opprimuntur prudentiorum studiis, et fiunt tandem, qui supersunt mercatores, peregrinorum proxenetae. *)

*) Docent historiarum monumenta, nullam fere gentem commerciis floruisse, nisi adiutam singulari reipublicae fauore; multarum mercaturam debilitatam et oppressam, quum eo careret.

XVIII.

Quum omnes reipublicae commerciis indigeant, commercia fauore; ad omnes pertinent, grauissimae quas explauimus fauoris commerciorum causae. *) Quo vero magis commerciis ad publicam salutem indigent ciuitates, quo minus illis videntur aptae; quo grauiora adiunguntur impedimenta; eo magis amplificandus est commerciorum fauor, vt scilicet sufficiat necessitatibus reipublicae, et vincat, quae commodis obstant, omnia. Dantur fauoris gradus. Summi, modo iustus sit, iustas habemus causas.

*) Nulli genti conducere commerciorum neglectum, nisi quae nulla prorsus re abundat, et nihil habet, quod mutare possit, eleganter docet III. MONTESQUIOU. *Esprit des Loix* XX, 21. Ea vero paupertas, non naturae vitium sed hominum, quod corrigi par est, non foueri.

XVIII.

Iustus vt sit commerciorum fauor, iis se contineat finibus, iis limitibus, quos fauori omni, summo etiam, iura ponunt et leges.

XVIII.

Demonstrauimus ius esse cuique homini, qua potest ratione saluti suae consulendi, dummodo a laedendo aliorum iure

iure abstineat. Ostendimus porro, homines suo iure vfos, salutis suae, coitione in ciuitates, consuluisse, inde vero consequi, vt salus populi suprema sit ciuitatis lex, et vt ius sit ciuitati salutis suae omni qua potest ratione prospiciendi, modo a laedendo aliorum iure se cohibeat. Quamuis ergo iubet salus publica, vt quaedam personae vel negotia singulari fauore iuuentur: ille tamen fauor eisdem habet limites, quibus ius publicae salutis consulendi continetur; prouidendum est ne laedat ius aliorum. Ius autem a quo laedendo abstinere coguntur, qui ciuitatibus praesunt, distributo in gentes humano genere, triplex est; Ius gentium aliarum, iustotius ciuitatis, ius singulorum ciuium. *) (IIII)

*) Ita scilicet salutis publicae cura, cum iustitia cohaeret, quam ciuitatum principes ac rectores, et aliis debent gentibus et ciuibus suis, tum omnibus, tum singulis. Nullus fauor iustus est, qui salutem publicam ab iustitia seiungit. *C'est la justice qui doit faire le principal objet d'un Prince; c'est le bien des peuples qu'il gouverne, qu'il doit préférer à tout autre intérêt. Le Souverain bien loin d'être le Maître absolu des peuples qui sont sous sa domination, n'en est que le premier Magistrat.* ANTIMACHIAVEL. Ch. I.

XX.

Traducenda sunt ad formam, de qua agitur, quae de genere demonstrauius. Fauendum est commerciis, sed ita vt fauore illo nec aliarum gentium, nec totius ciuitatis, nec ciuium singulorum, iura laedantur. *)

*) Vti in omnibus fauorum formis, ita in commerciorum quoque fauore, seruanda est verissima illa limitum regula, ad quam amplissimum dotium fauorem dirigit POMPONIVS L. 6. §. 2. D. de Iur. dor. XXIII, 3. *Bono et aequo non conuenit, aut lucrari aliquem cum damno alterius, aut damnum sentire per alterius lucrum.*

XXI.

Primo quidem non laedenda sunt commerciorum fauore, iura aliarum gentium. Id vt sine ambiguitate possit intelligi, definiendum est, quodnam sit gentibus ius prohibendi vel limitandi alius gentis commercia. Est id ius omne vel pactis

antiquius vel pactione introductum. Vtroque perspecto, patebit, quae sint illa gentium iura, a quibus laedendis abstinere iubetur commerciorum fauor. *)

*) Praemoneo, disputari de iure perfecto cui cohaeret ius cogendi, non de eo quod sola suadet honestas et utilitas. Quid in hoc fauor commerciorum efficiat monuimus supra, et explanabimus in secundo quem meditatur libro. De eo iam quaeritur, quos perfecto iure, gens alius gentis commercio ponat limites. Quod argumentum egregie illustant, qui de commerciorum libertate scripserunt, vti HEINECCIUS; porro qui de Mari libero, mari clauso, dominio maris disputarunt, in quibus eminent HUGO GROTIUS, IOANNES SELDENUS, CORNELIUS BYNCKERSHOECKIUS. In primis vero commendandi sunt harum rerum studiosi, scriptores, quae in controuersiis gentium de iure prohibendi et limitandi commercia ab utraque parte editae sunt. Et si enim in illis vera falsis, incertis certa mirifice misceantur, prosunt tamen egregie ad colligenda totius causae principia et argumenta, et ad intendendam in omnes partes aciem. Laudandi sunt eo nomine, ut ex multis afferam paucos, quos de Indiarum iure scripsit libros IOANNES DE SOLORZANO PEREYRA; porro quae de iure navigationis et commerciorum Indiarum orientalium, inter Batavos et Belgas Austriacos disputata sunt, in primis, *la Refutation des Arguments, avancés de la part des Mrs. les Directeurs des Compagnies d'Orient et d'Occident des provinces unies contre la liberté du commerce des habitans des Pays bas* MDCCCXIII. quae auctorem habet P. MAC. NENY Imperatoris in Belgio Austriaco Consiliarium et fisci procuratorem extraord. et quae ei oppositae sunt ABRAHAM WSTERWEEN *Dissertationes de iure quod competit Societati privilegiatae Foederati Belgii ad Navigationem et Commercio Indiarum orientalium* atque V. C. IOANNIS BARBEYRAC *Défense du Droit de la Compagnie Hollandoise des Indes orientales contre les nouvelles prétensions des habitans des Pays bas Autrichiens*. Addi merentur quae in Belgio, occasione concessi a Rege Lusitaniae IOANNI D'ANSAINTIO et SOCIIS privilegii exercendi in oris Africae commercia, prodierunt Legati regis Portugalliae DIOGO DE MENDOZA CORTE-REAL et Societatis Belgicae Indiarum Occidentalium, disputationes mutuae MDCCCXXXVII. Taceo plura, quae ex gentium litibus, legatorum litteris et Actorum publicorum voluminibus in hanc rem vtiliter possunt colligi. Egregiam eiusmodi disputationum publicarum copiam inuenimus in THOMAE KYMERI et SANDERSONII Foederibus, Conuentionibus, Litteris et cuiuscunque generis Actis publicis, inter reges Angliae, et alios Imperatores, reges, reliquos inprimis Tomo XVI.

XXII.

Iure perfecto gens in suo territorio aliarum gentium commercia prohibere et limitare potest, nisi quoad pactis ius hoc circumscribitur. *) Est nimirum territorium omnis regio, quae subest imperio reipublicae; in eo ergo imperantibus ius est dirigendi actiones liberas omnium qui sunt in territorio: possunt proinde ciuibus imperare, cum quibus et quae lege merces mutare liceat; possunt peregrinis, qui ad territorium accedunt, commercia permittere aut negare, et si permittant ea exigere vestigalia, eas iubere leges, quas suae ciuitati conducere existimant. Iure suo gentes hanc summi imperii partem tuentur et omnes ab ea laedenda abstinere cogunt. Nullo contra iure, nullo fauoris commerciorum praetextu, ab aliis ad eam deferendam cogi possunt. Eo iure ante pacta vtuntur. Quodsi vero gentibus cum peregrinis, de concedendo commerciorum iure, et de eius conditionibus conuenerit; tum sane pactum bona fide seruandum est, et quamdiu ex conuentionis lege valet, nec negari potest commercii ius, nec mutari queunt conditiones. Imponit sibi pacto ciuitas, seruandi necessitatem, adquirunt peregrini ius cogendi.

*) Nostrum iam non est disputare, qua ratione adquirant vel amittant territoria gentes. Quamdiu territorium possident, possident imperii iura. Mare, quatenus possidetur et defenditur, territorio reipublicae cohaeret, eiusque imperio subest. Caeterum non repugnare ut sint in ciuitatis imperio, quae non sunt in eius dominio, notissimum est. HUGO GROTIUS de Iure Belli et Pacis II, 3, 4.

XXIII.

Nulli genti ius est extra suum territorium, aliarum gentium commercia prohibendi et legem illis dicendi, nisi id sibi ius pacto quaesuerit. Coharet gentium imperium territorio. Si igitur gens, imperii iura in alius gentis territorio exercere vellet, non suo vteretur iure, sed laederet potius ius illius gentis. Si eadem iura in mari vel terra exercere vellet,

vetter, quae nec ad eius nec ad alius gentis territorium pertinet, laederet ius omnium hominum in res nullius. Ius vero prohibendi et definiendi commercia gentis cum gente, pars est summi imperii. Quo ergo iure imperium genti extra territorium negatur, quod sit antiquiore pactis gentium iure, eodem ipsi potestas adimitur, terminis circumscribendi commercia aliarum gentium, ultra territorii fines. Potest tamen eiusmodi ius pactis acquiri. Si enim paciscitur nobiscum gens de terminis, quibus commercia definire spondet, ius nobis tribuit, eam cogendi, ut stet pactis nec ultra constitutos progrediatur fines.

XXIV.

Demonstrauimus non esse genti ius limites aliarum gentium commercii ponendi, nisi intra territorium aut ex pactis. Addenda tertia species, sed temporaria illa, et quae sola necessitate defenditur. Ius scilicet prohibendi tempore belli commercia hostium nostrorum cum gentibus aliis, nisi obstant pacta. ~~Est nimirum genti cuius ius, iura sua, si ab aliis gentibus laedantur, bello tuendi, idque bellum faciendi hostibus, donec ei de reparatione damni iniuria dati et de publica in posterum securitate satis fuerit prospectum.~~ Dato autem belli iure, datur etiam ius genti, faciendi omnia sine quibus propositi bello fines vel prorsus vel aequae celeriter obtineri nequeunt; prohibendi quae alunt bellum et cum eius finibus pugnant. Hostes, si dematur illis occasio accipiendi ab aliis ea quorum indigent, exportandi illa quibus abundant, priuari saepe belli ducendi subsidiis et compelli ad maturandam pacem; si contra fiat, ali posse bellum et trahi diutius: facile intelligitur. Gens ergo, quae iustas habet belli causas, belli tempore, iure perfecto commercia hostium cum gentibus aliis omnibus prohibet, et quod huic cohaeret, eodem iure alias gentes cogit, ne accedant commercii causa ad hostium territorium. *) Quod si vero pactis prouisum

sum fuerit, quod in foederibus commerciorum scimus fieri frequenter, vt belli quoque tempore liceat amicis aut qui neutras sequuntur partes, commercia cum hostibus exercere; tum sane intra definitos pactis fines, extinguuntur bellicum prohibendi ius.

*) Repeto quae praemonui. Disputamus de limitibus quos ius gentium perfectum fauori commerciorum ponit, pacis bellicue tempore. Quid humanitatis lex, quid praecepta prudentiae, belli quoque tempore gentibus in fauorem commerciorum iubeant, suadeant, videbimus alio loco. Caeterum de iure interdicendi hostes commerciis legenda sunt, quae scripsit HUGO GROTIUS de Iure Belli et Pacis III, 1, 5. et in Annotatis ad hoc caput. CORNELIVS BYNCKERSHOECKIVS Quaest. Iur. Publ. I, 3, 9. Addatur Dissertatio erudita et elegans Viri Consultissimi CAROLI FERDINANDI HOMMELII de Commercio in S. R. Imperio tempore belli interdicto, Lipsiae ad disceptandum proposita cło 10 cc XLV.

XXV.

Solent saepe gentes, quae prohibent aliarum commercia, vt faueant suis, ius suum praescriptione tueri. Inquirendum igitur num acquiri possit praescriptione ius, aliarum gentium commercia, extra territorium, sine pactio- nis interuentu, et extra belli necessitatem prohibendi, limitibusque circumscribendi. Grauis incidit controuerfia, quae sit inter liberas gentes praescriptionis vis, quae natura. Non interponam meum in praesenti iudicium. Nec eo, quam tueor commerciorum causa indiget. Certum est, gentium iure, continuationem laesionis per longissimum tempus, nunquam sufficere ad acquirendum ius porro laedendi. Gens quaeque summum habet intra territorium imperium, extra territorium nullum, nisi ad propellendam bello iniuriam necessarium, aut legitimis quaesitum pactis. Si ergo in gentem liberam extra territorium, extra belli necessitatem et sine iure pactis quaesito, imperium affectat, laedit gentis libertatem et imperium, quae laesio, quum factum sit illicitum, laedenti ius tribuit omnino nullum. Nec efficit patientia laesae gentis,

D

vt ea

vt ea imperii adfectatio, laesio esse desinat et consensu tacito iuris induat naturam. Non significat iniuriae consensum tacitum, sed vel iuris aut facti ignoracionem, vel metum maioris ex defensione mali. Quod inter gentes coertius, quia non solent impune laedi, nisi dolo aut vi fortioris, nec iudiciis defenduntur sed armis, in quibus nulla spes, si cum potentiore sit concertandum *). Sequuta ergo rerum conuersione, si laesa gens, aut rectius aestimare discit ignorata laesionis damna, aut se illi sine metu maioris mali depellendae parem sentit, laedentem iure perfecto cogit, vt a laedendo abstineat et damnum iniuria datum reparet. Transferamus generatim dicta ad ius commerciorum. Ius legem dicendi commercii, pars est summi imperii; eam ergo quaeuis gens liberrime in suo exercet territorio, sed exercere nequit extra territorium, nisi permittant pacta, aut iure belli in hostico. Quae ergo gens extra territorii fines aliarum gentium commercia circumscribit et definit, quum id faciendi nec ex pacto ius habeat, nec ex belli iustitia; ea illas laedit gentes, et continuata per longissimum tempus laesione, nullum acquirit porro laedendi ius; nec amittunt laesae gentes, laesionis patientia, ius eam simul ac possunt, quauis ratione depellendi. Iisdem argumentis demonstratur, nec posse longissimi temporis lapsu acquiri, ius cogendi gentem liberam, vt nobis in suo territorio commercia permittat et ab illis limitandis abstineat. Effet nimirum illa coactio, laesio imperii, quod cuique genti intra territorium libere exercere licet. Patet denique ius commercii inter liberas gentes, vsus intermissione non amitti, quia illa vsus intermissio a libera gentis voluntate pendet et aliis ius prohibendi, sine pacto, non tribuit.

*) Ita inter gentes liberae pronuntiandum existimo, inter quas nulli iudiciis adeundi potestas. Alia ratio eorum est qui ciuili imperio subsunt et iudiciis iura defendere possunt. Recte respublica leges ciuili iubet, et ciues intra definitum tempus in res suas inquirant et iudicem.

iudicem iuris defendendi causa adeant, id vero si neglexerint, iure suo excident: ut scilicet sit litium finis. L. 5. D. pro suo XLI, 10 et ne quarundam rerum diu et fere semper incerta dominia essent, quum sufficeret dominis ad inquirendas res suas, statuti temporis spatium L. 1. D. de vsurp. et vsucap. XLI, 3.

XXVI.

Nec plurium gentium utilitas, ius illis extra territorium tribuit, cogendi pauciores, ut sibi commerciorum legem et modum statui patiantur. Gens enim obligatur genti, ut homini homo extra ciuitatem, perfecte scilicet ne laedat, imperfecte ut alterius felicitatem salua sua amplificare studeat. Iure ergo cogitur gens, ut a laedendo abstineat, non ut studeat aliarum commodis: relinquendum id est humanitati et prudentiae gentis, nec laedenda ea iniusto coactu.

*) Scripsit Viracutissimus MELONIVS Cap. I. pag. 3. *C'est là le Droit naturel et primitif des Nations, selon lequel le Droit d'une Nation particulière cède au Droit des autres Nations ensemble; de même, que le Droit d'une Famille ou d'un particulier cède à celui de sa Nation.* Recte omnino adferit, postponendum esse cuius priuati commodum, commodis totius ciuitatis, cui adscriptus est; quod exinde non vtile solum, sed et iustum est, quia regula, quae comoda totius ciuitatis commodis singulorum anteferri iubet, continetur in ipsa ciuilibus consociationis et subiectionis lege. At dispar est et longe alia integritas gentium conditio. Eae nulla consociationis lege, ad comoda singularum vel pauciorum, commodis omnium aut plurium postponenda, perfecte obligantur. Custodia enim societatis illius vniuersalis, quae ut omnes homines, sic omnes complectitur gentes, non obligat nisi imperfecte ad aliorum comoda prouehenda, nec tribuit ius cogendi alios ut nobis prosint. Quod eo fieri potest minus, si aliorum utilitates nobis nocent: in republica lege consociationis, ciues singuli, publicam salutem, si alia ratione obtineri nequeat, priuatis redimere coguntur incommodis et damnis, at extra ciuitatem si aliorum comoda cum meis pugnant, iure mea praefero. Est praeterea in ciuitate, legitima potestas, cui ius est decernendi, quando plurium salus vincat pauciorum comoda. At inter gentes nemini ius est decernendi, quando pauciorum utilitas postponenda sit utilitati plurium. Vnde ignorat hanc legem ius gentium cogens. Si igitur utilitas pauciorum gentium cum utilitate plurium pugnat, nec adsint pacta, quae pugnam dirimant, tunc eorum qui paucioribus illis imperant est officium, ut rationibus accurate collectis et subductis statuunt, vtrum conueniat saluti reipublicae ut, quod facere possunt iure stricto, eius praeférant comoda, an ut

remittant aliquid et caeteris illis gentibus cōnuent. Finge, gentem maritimi commercii expertem huc vsque, consilium capere nauigandi in Asiae vel Africae partem, permittere id qui partibus illis imperant, nec ob stare pacta, alias autem gentes aegre ferre diminui lucra commercii maritimi, concursione plurium. Restene gentes illae statuont, anteferendas esse vtilitates plurium vtilitati vnius, et cogendam vnam illam gentem vt nauigatione abstineat. Minime.

XXVII.

Vidimus pactis acquiri ius cogendi gentes, vt in subiecto earum potestati territorio, abstineant facultate legem commercii peregrinorum dicendi, quam volunt: at pactis quoque quaeri ius modum statuendi aliarum gentium commercii extra territorii limites. Fit inde, vt saepe incidat quaestio, liceatne fauore commerciorum, violare pacta, commerciis nostris inimica. Qui licere defendunt, inesse existimant pactis gentium omnibus tacitam publicae salutis exceptionem, et iure ab illis recedi, si reipublicae detrimento esse coeperint, *) esse vero liberum commercii ius, in praecipuis publicae salutis instrumentis. Blanditur commerciis sententia ista, non fauet. Pugnat enim cum bona fide, qua nulla res vehementius humani generis societatem continet, qua nulla efficacius publicam tuetur pacem et securitatem. Nec licet indicto bonae fidei bello, commerciis fauere, quae sine bona fide consistere omnino nequeunt. Nec ferendum publicae salutis simulatione, fidem violari qua illa nititur, et qua sublata subruí eam necesse est et euerti. Redit res ad prima quae posuimus principia. Ius est ciuitati, saluti suae omni qua potest ratione consulendi, dummodo non laedat ius aliorum. Ius vero est illis cum quibus paciscitur ciuitas perfectum, cogendi eam, vt pacta seruet. Id nunquam laedi patitur, quae suum cuique tribuit iustitia. Curandum ergo est rerum publicarum rectoribus, ne pacta ineant, commercii ciuium aduersa, at inita bona seruentur fide, nisi constet euidenter, nos illis ob passionis vitium ab initio

ab initio non fuisse obligatos, aut gentem cum qua pacti sumus, ipsam, pactis detraxisse obligandi vim.

*) Scripsit, quo consilio, in praesenti non disputo, NICOLAUS MACHIAVELLI in libro *Del principe* Cap. XVIII. *Non può per tanto un Signore prudente, nè debbe osservare la fede, quando tale osservantia gli torni contro, et che sono spente le cagioni che la fecero promettere. Se gli buonini fusseno tutti boni, questo precetto non saria buono: ma perche sono tristi, et non l'osserverebbono à te, tu ancora non l'hai da osservare à loro. Non potest responderi rectius, quam factum est in libro aureo L' ANTI-MACHIAVEL Ch. XVIII. Que Cartouche vole, pille, assassine, j'en conclus que Cartouche est un Malheureux qu'on doit punir, et non pas que je dois régler ma conduite sur la sienne. S'il n'y avoit plus d'honneur et de vertu dans le monde, ce seroit chez les Princes, qu'on en devoit retrouver les traces. Non indigent homines perfidiae magistris, cuius abundant exemplis. Graviter bonae fidei humanique generis causam orauit et animose Vir amplissimus CORNELIVS VAN BYNCKERSHOECK Quæst. Iur. Publ. II, 10.*

XXVIII.

Designaui primum fauoris commerciorum limitem; ne laedat ius aliarum gentium: progredior ad alterum; ne laedat ius publicum ciuitatis. Duo id habet summa capita. Primum, ius et officium rectorum ciuitatis versatur in eo, vt consulant totius reipublicae salutem: alterum, vt id faciant ex praescripto legum et pactorum, in quibus posita sunt reipublicae fundamenta. Vtroque regitur, is de quo disputamus commerciorum fauor.

XXIX.

Fauendum est commercii, sed ea ratione vt consulat ille fauor salutem reipublicae totius. Profunt reipublicae commercia. At non omnia: sunt quae nocent. Iubet ergo ius ciuitatis publicum, discerni ab vtilibus noxia, premi haec, faueri illis, huc dirigi summam qua pollent imperantes, legum ferendarum et ordinandae reipublicae potestatem. At, vt satisfieri possit iussui aequo sane et bono, iungenda iuris arti, prudentia et ciuilibus illa et mercatoria. Non sufficit consuli a principibus, viros ciuilibus prudentiae gnaros, sunt enim illi plerumque, rerum quae ad interiores mercaturae et

commerciorum rationes quaestusque compendia pertinent, aut ignari prorsus, aut non satis periti. Sed nec sufficit consuli mercatores; ut enim taceam nondum abundare ordinem illum viris qui ultra formulas sapiunt et paternas consuetudines, sunt in iis multi qui blandiuntur suauiter principum auribus boni publici simulatione, sed id agunt ut neglectis aliis, iis faueatur commerciis, quae ipsorum lucra augent, licet diminuunt totius reipublicae facultates. Iungenda ergo vtriusque partis consilia, sed ii maxime audiendi mercatores, qui arti, prudentiam iungunt et animi candorem, ut caussa omni perspecta is certo statuatur iudicio, fauori commerciorum limes et modus, qui cum totius reipublicae salute consentit. Dabo regulas, quae et intelligi possunt et demonstrari, ex praemissa de formis commerciorum et de nexu eorum cum salute reipublicae doctrina. Prima, de commerciis internis vel domesticis. Ea vero semper reipublicae sunt fructuosa, si id efficiunt, ut nihil in republica sit sterile, nihil otiosum, et ut respublica a peregrinis accipiat pauca, det iis multa. De externis tres habeto, quae artissime cum prima illa cohacent. Quae cum peregrinis commercia efficiunt, ut subductis rationibus omnibus, plus nostra respublica a peregrinis accipiat auri argentique, quam alienae a nostra, illa ad salutem publicam sunt utilia, et singulari iuanda fauore. Quae vero faciunt, ut plus auri argentique peregrini accipiant a nostris, quam nostri a peregrinis, illa quoad fieri potest, coerceri par est et reprimi. Quae denique, non nisi aequalitatem lucri, inter nostros et peregrinos efficiunt, coercenda non sunt, nec tamen singularem merentur fauorem, satis ea tuetur mutua libertas. Late patet haec inquisitio et multis impeditur difficultatibus, quas ut superet sagax inquisitor, in tria aciem intendant necesse est. Ut noscat scilicet PRIMO, proportionem eius quod soluit respublica peregrinis et quod peregrini soluunt ciuibus, et cui parti,

parti, collectis et subductis rationibus omnibus, cedat quod aequalitatem superat lucrum *). DEINDE partes commerciorum quas exercet vel exercere potest respublica omnes, et quid ad illam proportionem conferant, vel conferre queant, singulae **). DENIQUE subsidia adcommodatissima ad conferuanda et augenda vtilia, ad reprimenda et coercenda noxia ***). Tantum scilicet opus est leges dare commerciis, quibus consulatur saluti totius reipublicae.

*) Solet id appellari *La Balance du commerce*, cuius accurata cognitio fundamentum est et regula consiliorum de iuuandis favore commercii. Duæ sunt inuestigationis viæ. Prima, vt inquiratur in proportionem mercium quæ exportantur et inuehuntur, vtrisque rite aestimatis. Si enim appareat, nos plus mercium accipere a peregrinis, quam accipiunt a nobis peregrini omnes, aestinato vtrunque aequaliter pretio, tunc certum est nos perdere: si contra sit, nos lucrari. Altera, vt inquiratur in proportionem, quæ obtinet in permutanda cum peregrinis pecunia. (*Le cours du change*). Debent Amstelædamensibus Londinenses, Londinensibus Amstelædamenses; ne ergo necesse sit mitti vtrinque et remitti sæpius eandem pecuniam, magnis impensis, nec minori periculo, compensantur debita vel inter debitores ipsos vel interuentu aliorum, in diuersis sæpe emporiis. Fit id per cambia, vt aiunt, transacta. Londinensis soluturus Amstelædamensi, quaerit cambium, ab eo cui Amstelædamensis debet, Amstelædamum transactum. Quo transmissio compensantur debita. Iam scimus augeri pretia rerum ea proportionem, quæ est inter numerum rerum quæ quaeruntur et numerum earum quæ adfunt. Si ergo Londinenses plus debent Amstelædamensibus, quam hi illis, non possunt non rariora esse cambia transacta Londino Amstelædamum, quam Amstelædamo Londinum, et plures tamen indigebunt illis quam his. Vnde cambium C. Florenorum transactum Londino Amstelædamum maiori emendum erit, pretio, quam cambium C. Florenorum transactum Amstelædamo Londinum. Contra erit si Amstelædamenses plus debent Londinensibus. Si denique debita vtrinque sint aequalia, aequale erit cambiorum eiusdem summae pretium. In ea vero computatione, demendæ sunt mutationes subitæ et temporariæ, quæ non ex proportionem debitorum sed extrinsecus ex alio genere proveniunt, et facile distinguuntur, a peritis harum rerum. His demtis, si rite componantur, reciproca cambiorum transactorum pretia, intelligi poterit, quæ regio plus debeat alteri, quæ minus.

**) Si propositis subsidiis visperspicimus, plus nos debere peregrinis, quam peregrini debent nobis, plus inuehi mercium quam exportari; agendus

agendus erit commerciorum quae sunt nostris ciuibus cum peregrinis census, et inquirendum quibus efficiatur, vt plus debeant nostri, quibus contra effici possit vt plus debeant nostris peregrini. Illa reprimenda, haec iuuanda. Pertinent ad classem commerciorum summe vtilium, 1. quibus exportantur merces arte et industria incolarum elaboratae, 2. quibus exportantur merces superfluae, quae arte industriaque non perficiuntur, 3. quibus inuehuntur merces arte et industria ciuium perficiendae, et vendendae dein aliis, 4. quibus mutatio mercium inter peregrinos, interuentu ciuium nostrorum cum fructu peragitur. Contra ad classem summe noxiorum, 1. quibus exportantur prouentus naturales, quorum indiget regio ipsa, vti annona, quae vt sufficiat incolis omnibus, prima merito est legislatoris cura v. MELON. Cap. II. p. 15. 2. quibus exportantur merces, quae occupare potuissent vtiliter artes et industriam ciuium, 3. quibus inuehuntur peregrina, eo effectu vt negligantur domestica. Sunt haec summa genera, ad quae referendae sunt species, sed spectata semper permutationum necessitate et proportionem, qua fit, vt commercium quod si solum esset, foret noxium, fiat vtilissimum, si iuuat permutationem, cuius maiori lucro, minora pensantur damna. v. MELON. Cap. XIX. pag. 256. REFLEXIONS POLITIQUES Tom. II. Art. 7. p. 168.

**) Adhiberi potest vtiliter prohibitio exportationis vel inuectionis noxiae, nisi turbetur ea permutationis vtilitas. Si secus fiat, cauendum ne periculosior sit morbo medicina. Supperunt alia. Minuere vestigalia vtilibus, augere noxiis. Efficere vt comparata mercium nostrarum et peregrinarum bonitate, aequiori nostrae emi possint pretio. Taceo plura, quae Libris posterioribus, vbi per singulas partes eundem erit, vberius enarrabo et fusius.

XXX.

Alter limes quem Ius publicum fauori commerciorum constituit, is est, ne quid fiat aduersus leges et pacta, in quibus posita sunt reipublicae fundamenta. Oraui supra causam bonae fidei in iure gentium et demonstravi seruanda esse pacta, etiamsi commerciis fuerint inimica. Eadem res hic agitur. Obstricti sunt imperantes, vt seruent bona fide constitutas et pactas de forma et administratione reipublicae leges. Faucant ergo commerciis, qua possunt ratione, sed ita ne laedant formam imperii publicis legibus et pactis stabilitam. *) Si pugnent publicae leges et pacta cum fauore commerciorum, operam dent vt consensu eorum mutantur, penes

penes quos mutandi ius est et potestas. Id si obtinere nequeunt, seruent legitime constituta. Ferenda sunt mala, quae nequeunt depelli, nisi malo facinore.

*) Cautio haec in iis rebus publicis necessaria, in quibus adstricta legibus imperantium potestas; multoque magis si accedat forma ad Systema ciuitatum foederatarum. Sic in magna Britannia, non licet regi legibus prouidere commerciis, nisi consentiat augustum regni concilium, quod Parlamentum appellari solet. In Belgio Foederato singulae prouinciae iure summae potestatis ordinant commercia ciuium suorum, sed ita ne laedant consociationis leges. v. CORNEL. VAN BYNCKERSHOECK Quaest. Iur. Publ. II, 23. 24. In Imperio Germanico ius dirigendi commercia in iis quae totum spectant imperium, pertinet ad Imperatorem et Electores INSTR. PAC. OSNAB. Art. IX. §. 1. 2. MONASTER. §. 67. 68. reliquosque principes et status CAPIT. IMP. FRANG. I. Art. VII. §. 3. in territoriis ad dominos, saluo nexu totius imperii. INSTR. PAC. OSNAB. Art. VIII. §. 1. CAPIT. IMP. FRANG. I. Art. VII. §. vide KEMMERICHII Introd. ad Ius publ. V, 10, 74. seqq.

XXXI.

Limites ponit commerciorum fauori ius gentium, ponit ius publicum totius ciuitatis, sed ponit etiam ius singulorum ciuium. Ius est ciuibus singulis postulandi, vt in re publica securitati et vtilitatibus singulorum consulatur, nisi manifesta necessitas exigat, vt anteferantur publica commoda priuatis. Continetur ius id singulorum, in prima consociationis ciuilibis origine et lege. (II. III.) Iure ergo perfecto singuli ciues postulant, ne laedantur ablatione sui: iure imperfecto vt eorum vtilitatibus prouideat respublica. Quum autem imperantium sit, vires et voluntates singulorum dirigere ad communem salutem, est ipsis ius eminens statuendi de iure ciuium. Redit id ad quatuor capita: PRIMO legem dicunt ciuibus qua ratione tuendum sit ius perfectum, ne turbetur publica tranquillitas. DEINDE si cogat fatalis reipublicae necessitas, cogere possunt ciues, vt renuncient iuri perfecto. PORRO modum statuunt studio singulorum, vtilitatibus priuatis consulendi, ne id obsit vtilitati totius rei-

E

publi-

publicae. DENIQUE in cura vtilitatis singulorum, quam gerunt ipsi, recte si commoda plurium cum commodis pauciorum pugnent, praeferunt vtilitates plurium. Duplici tamen cautione opus est, altera si adimitur ciuibus ius, demta necessitate, perfectum: altera si negligitur imperfectum. In adimendo illo; ne id fiat, si alia ratione securitati ciuitatis consuli potest, vtque damnum, quod passus est reipublicae causa ciuis, a republica quoad fieri potest reparetur. In negligendo hoc; ne ad postponenda commoda pauciorum, deueniatur, si consuli potest omnibus, si vero postponenda omnino sint, vt paucioribus illis alia ratione prospiciatur. Ad has leges dirigendus est commerciorum fauor, ne laedat, ius singulorum ciuium: hae illi adhibendae cautiones, si pugnant in iuuandis cominerciis, commoda pauciorum, cum vtilitatibus plurium aut totius reipublicae.

*) Satisfecit causae grauissimae, Vir illustris CHRISTIANVS LVDOVICVS STIGLIZ Disputatione de Iure imperantium in ius quaesitum subditorum Lips. c13 13cc XIII. Rec. c13 13cc XLVIII.

XXXII.

Non opus est vt transferam nominatim ad commercia, quae de iure singulorum ciuium dixi in vniuersum. Addam tamen duo exempla, quae in controuersiam adduci solent frequenter: primum de iure ciuili constituto et recepto; de priuilegiis alterum.

XXXIII.

Ius est ciuitatum rectoribus legem dicendi ciuibus, quae regat iura singulorum et modum ea tuendi. Liberum illis porro est, vtrum ipsi ius constituere velint ciuitati, an recipere ciuitate peregrinum. Liberum denique, definire quae iure scripto dirimi velint, quae relinquere moribus et aequitati. Constituto autem vel recepto iure ciuili, postulant suo iure ciues, vt ex eius praescripto aequale ipsis dicatur ius. Si ergo animaduertant ciuitatis rectores, pugnare ius constitutum

tutum vel receptum, cum eo quem commerciis debent favore, possunt sane noua lege abrogare priorem et mutare. Ante vero quam ea mutatio facta et noua illa lex rite fuerit promulgata, pronunciandum est, secundum priorem, ne laedatur quaesitum inde ciuibus singulis ius; quod nunquam licet nisi summa urgeat necessitas. Multo vero minus iudiciis est permittendum, ut in re, ciuili iure definita, nec alia lege mutata, recedant a iure scripto, et inuolent in iuncta rectorum et ciuium iura. Licet ergo id efficere possit commerciorum fauor, ut ciuitatis rectores mutant iura commerciis inimica; ut iuris interpretes in re dubia eam praeferant sententiam, quae fauet commerciis: nunquam tamen eius simulatione, recedendum est, a iure quod legitima auctoritas constituit, necdum mutauit. Ponit scilicet ius ciuitatis priuatum limitem fauori commerciorum, in causis priuatis.

XXXIV.

Adiungam alterum. Priuilegium datum ciui legitime, ius ei tribuit, postulandi ut illo fruatur tranquille, secundum concessionis formulam. Curandum ergo principi, ne largiatur nisi vtilia reipublicae, et innocentia. Data, salua sint: nec reuocentur temere, nisi id iubeat euidentis reipublicae necessitas. Nec interest, gratuitane sint an onerosa, legem dat utrisque promissio legitima et bona fides. Si ergo cohaeret priuilegium cum commerciorum causa, non id efficit eorum fauor, ut id possit violari antequam reuocetur, nec ut reuocari queat temere. Quodsi vero id tolli iubeat euidentis necessitas, equidem aequum et bonum existimo, ut respublica qua potest ratione damnum ciui resarciat, qui priuilegium, praemium laboris aut dato impetrauit pretio, nec eos inde cepit fructus, qui aequent laborem aut pretium.

*) Adde HERMANNI CONRINGII Disquisitionem de Priuilegiis recte conferendis et reuocandis. Helmst. c. 136 LXXIX. III. GEBAVE-

RI Singularia de privilegiis. XX. III. CHRIST. L. B. de WOLF
Instit. Iur. nat. et gent. §. MXLVII.

XXXV.

Egi finitorem. Quo functus officio, explanabo tandem quid efficiat fauor ille commerciorum; cuius ostendi causas et designavi limites.

XXXVI.

Quae negotiis quibusdam fauet respublica, id cura singulari et iuris beneficiis efficere nititur, ut et fuscipiantur frequenter et conficiantur feliciter. Is ergo commerciorum fauori propositus est finis, ut floreant in utilitatem reipublicae, ut singulas eorum partes, quae quidem ciuitati profunt, fuscipiant multi, et susceptas peragant feliciter.

XXXVII.

Id primo efficiendum est, ut alliciantur multi ad faciendam mercaturam, non tenuem illam solum et tabernariam, sed magnam maxime et copiosam. Mouentur honore homines et utilitate. Sit ergo in republica quae commerciis fauet honestum, sit utile, operam dare commerciis. Recte respublica ciues in diuersos distribuit ordines, et ut prospiciatur omnibus, cuique ordini quaerendarum facultatum legem dicit: recte eos qui publicis destinantur muneribus, iis abstinere iubet negotiis, quibus auocantur ab officio, et in faciendo impediuntur. Aestimandum ergo ex reipublicae statu et ordinum descriptione, quibus permittendum sit mercaturam facere, quibus negandum. Id autem firmum sit semper et stabile: honestam esse mercaturam omnem, si fiat honeste: sordidam nullam, nisi hominum non artis vitio, mendaciorum et turpis lucri sordibus obsolescat. *) Honos in ciuitate quae fauet commerciis, habeatur omnibus, qui mercaturam honeste faciunt; nec occludat ea, sed muniat potius viam, ad altiores honorum et dignitatum gradus: ornentur prae-

praeterea singularibus honorum praemiis, quorum spectata in mercaturis industria, maxime prodest reipublicae. At fortius multos honesto mouet vtile: nec deerunt vnquam reipublicae mercatores, abundabit mercatoribus respublica, si effecerit, vt nauata commercii opera, vtilis illis sit et fructuosa. Nulla ratione felicius ad mercaturam inuitantur et alliciuntur homines, quam si minuantur difficultates, augeantur commoda, ponantur in medio lucra periculis ampliora. Sint haec communia omnibus. In iis autem commerciis, quibus suo damno caret respublica, si ea praesertim magnas habeant difficultates, multa pericula, proponantur vtilitates praecipuae, praemia singularia, quibus ad audendum excitari possint meticolosi, incitari audentes.

*) Sunt qui CICERONEM de Offic. I, 42. 150. 151. sequuti, mercaturam tenuem, sordidam putant, quia in illa nihil proficiant homines, nisi admodum mentiantur: nec vero quicquam sit turpius vanitate. Sed si rem consideremus ipsam, sepositis hominum et vitiis et opinionibus: possunt sane homines in tenui etiam mercatura mendacia deuitare et lucri turpitudines: potest e contrario, magna quoque et copiosa, si faciant eam homines vitiosi, vanitate et turpi quaestu sordescere. Vnde, si honestatem ea metimur virtute, quae omnibus est colenda, ita ab honesta mercatura dinidenda erit sordida, vti vtramque diuisi. At seruandum est praeter propositam omnibus virtutem, viris principibus et senatoriis, consentaneum illorum dignitati decorum. In ea ergo republica, in qua adhaeret cuidam mercaturae, imminutae dignitatis opinio, sordidi sane sunt, viri principes et illustres, si ei se, neglecto ordinis decore, immisceant. Ita vero intelligendus videtur CICERO, vir consularis praeciens filio. Caeterum in republica mercatoria, nescio an possit rectius separari, mercatura quae viros illustres et nobiles decet, ab ea quae illos dedecet, quam separatur in legibus REIPUBLICAE IANVENSIS A. MDLXXVI. latis. Capite III. v. LVNIGII Cod. Diplom. Ital. Tom. II. p. 2158.

XXXVIII.

Cohaeret priori alterum. Efficiendum, vt suscepta peragatur feliciter; vt facere possint ciues mercaturam, copiosam atque vtilissimam et facientibus et toti reipublicae.

E 3

Eo ergo

Eo ergo dirigendus est commerciorum fauor, vt reprimantur, tollantur, proscribantur ex republica, quae commercia et capiendos ex illis fructus minuunt et impediunt; constituantur contra, conseruentur, et augeantur, quae commercia eorumque vtilitates iuuant et amplificant. Late patet haec cura, possunt tamen eius partes ad tria redigi capita *). Prouidendum commerciorum LIBERTATI, SECVRITATI, COMMODITATI.

*) Ad duo capita curam hanc reuocauit MELONIVS: Cap. II. p. 29. *La plus grande des maximes et la plus connue, c'est que le Commerce ne demande que liberté et protection.* Quum tamen sit eorum qui commercii fauent, vt non solum libertatem indulgeant, securitatem tueantur; sed vt commoditatibus etiam et opportunitatibus prospiciant, quod omnium optime ipse docuit MELONIVS; addidi tertium. Praebuit exemplum Ill. MASCOVIVS Diff. de Foederibus Commerciorum. §. IX.

XXXIX.

LIBERTATIS, prima esto et praecipua cura. Si ea salua sit, mercatores ipsi, destituti etiam a republica, satis saepe ingeniosi erunt, satis animosi, ad paranda securitatis praesidia, ad prouidendas opportunitates. Ea vero sublata, audentium ardor extinguitur, studia pressa diu tandem opprimuntur. *). Cauendum autem accuratè et sedulo, ne libertati confundatur licentia, quae solet ei esse finitima, vti vitia virtutibus. Est scilicet commerciorum libertas, potestas mutandi merces vti lubet, nisi quid publicae salutis causa prohibeatur. Fauore ergo commerciorum, liberum esto cuique cum quibus vult commercium: liceat cuique quas voluerit merces permutare, emere, vendere, exportare, inuehere: quo potest pretio, qua vult via: nec impediatur, prohibitionibus, exactione iniqua, priuilegiis excludentibus, nulla re alia: nisi quid in illis pugnet cum salute publica, adeoque iure prohibeatur. Salutis publicae rationes, a iustitia non posse sciungi, nec in commerciorum causa id licere vnquam, explanavi satis, quum de limitibus exponerem. Salutis

Salutis vero publicae, suprema lex, non patitur vt liceat ciuibus, quod illam laedit. Id ergo in commerciis reprimendum, quod publicae salutis aduersatur, et reprimi potest, sine iusto grauioris mali metu. Reliqua omnia libertati ciuium relinquenda. At repeto, quod me supra monere memini. Accurate in aestimandis publicae salutis praesidiis et impedimentis, colligendae et subducendae rationes omnes, ne falsa eius specie imminuatur libertas exceptionibus, commerciis, ipsique ciuitati noxiis. Monstravi viam (XXIX.) Sed opus est bono publicarum vtilitatum ratiocinatore. In re dubia, et in qua in neutram partem deprimitur lanx, praestat dilatarı libertatis fines, quam coarctari imprudenter.

*) Monet grauitur MELONIUS, Cap. II. p. 30. *Dans l'alternative entre la liberté et la protection il seroit bien moins nuisible d'ôter la protection, que la liberté.* Idem tamen recte Cap. XX. p. 280. a licentia seiungit libertatem. Adde L'ESPRIT DES LOIX XX, 11. 12.

XXXX.

SECVRITATI COMMERCIORVM, respublica consulit, si id efficit vt ab iniusta vi et malis fraudibus tuta sit, vtilis ciuitati negotiatio. Duplex ea est securitas; externa alia, alia interna. Illa ciues a vi et fraudibus eorum qui extra ciuitatem sunt praestat tutos: quo publica spectant belli et pacis negotia. Haec in ciuitate commercia a vi et fraude, legibus defendit, atque iudiciis. Vtriusque curam singularem fauor commerciorum reipublicae intime commendat, *) quoniam nulla vi et fraudibus grauior pestis, nulla frequentior: quam nisi arceat et depellat a mercatura ciuitas, hanc et impediri semper, et saepius opprimi necesse est.

*) Quam valde pertineant ad rempublicam commercia, ad commercia, securitatis externae atque internae cura, exponitur grauitur in praefatione regali DES ORDONNANCES DE LOUIS XIV SUR LE COMMERCE DONNÉES A S. GERMAIN. cl. 16 CLXXIII. Egre gie in Imperio Germanico vtrique prouidet INSTR. PAC. OSNAB. Art. IX. MONAST. §. 67. 68.

XXXXI.

XXXXI.

COMMODITATIS appellatione omnia denique comprehendimus, quibus commercii mutui facilitas et fructus augentur. Respublica enim quae commerciis fauet, omnia favore suo complectitur, quae faciunt vt labor, ars et industria ciuium omnibus sit fructuosa, vt indigeant paucis, abundant multis, et merces cum ciuibus et peregrinis mutare possint facile et vtiliter, quae cura multas habet partes et paene infinitas.

XXXXII.

Facile ex his quae diximus intelligitur, commerciorum libertati, securitati et commoditati non posse prouideri, nisi ciuitas cum aliis gentibus aut pacem colat et amicitiam; aut ciuium commercia vi et armis si opus fuerit defendat; ipsa vero res domesticas ita ordinet, vt iuuentur quae commercia augment, reprimantur autem quae iis nocent. Is ergo, de quo generatim egi commerciorum fauor, diffundit se in negotia reipublicae omnia tum externa tum domestica; quid vero in singulis possit, quid efficiat, de eo in secundo tertioque libro disputabo vberius.

